

Pushando Palu Bou di Kandela

Kiko ta pone nan hasié? Pakiko e bistínan ta eksponé mas i mas kueru sunú pa bista di hende? Sayanan ta bira mas kòrtiku, kòlnan ta yega mas serka flur, barika i lomba ta haña mas bientu.

Kisas e situashon ekonómiko ta prevení hende di kumpra mas tela! Si! Esei mes lo mester splika e skarsedat di tela na kurpa. Mas yarda bo ta kumpra, mas sèn bo tin ku saka. Ta lógiko...te ora bo ta wak preis di e bistínan. Na pakus ta lo kontrario: mas tela ta nifiká mas barata, i un bistí mikroskópiko ta bon karu. Ahaaa, nos ta kiboká...falta di sèn no t'e kousa di nos "flertmentu" ku desnudes.

Talbes t'e kalor! Si! Lo mester ta e kalor! E úniko manera ku nos por mantené nos kurpanan fresku, sin soda te kaba na nada manera un blòki di eis, ta pa bisti ménos paña òf usa tela mas fini. Mas di bo kurpa ku bo ta eksponé, mas di bo paña djabou ku ta visto, mas komfortabel bo ta sinti...

Ma warda un ratu. Ta un echu ku hende hòmber ta soda mas ku hende muhé. Pues, ta kabayeronan ku lo mester bisti ménos paña i usa tela mas transparente. Ma lo kontrario ta e kaso. Kompará largura di shòrt di hende muhé i hende hòmber riba kaya, lo bo ripará ku en general, shòrt di hende hòmber ta muchu mas largu. Kompará e kantidat di tela usá pa traha un blusa òf kamisa. Kasi semper e kamisa ta rekerí muchu mas tela. Talbes e blusa no tin manga, ta strèp so na lomba, i un drachi so ta pasa dilanti meimei di garganta i sintura. Nò, no ta kalor ku ta determiná e kantidat di yarda na kurpa.

Ta kiko anto?

Dios a krea hende hòmber pa ta atraí na e sekso femenino mas parti dor di bista. Esei ta un parti bunita di Su plan pa forma famianan. Ma hende muhé, hambrá pa atenshon, por hasi mal uso di esaki pa haña e atenshon nan ta deseá...bisti ménos tela. Ningun hòmber ku sanger den su adernan por keda sin ripará!

Segun mi por dedusí, tin solamente dos motibu ku tantu hende muhé ta eksponé nan kurpa:

1. Ignoransia...nan no sa kiko nan ta hasi. Talbes nan ta bisti sèksi pasobra esei t'e stail: "tur mi amiganan ta bisti asina".

Esei ta "mentalidat di tou"...pasobra ún karné ta hasié, tur otro ta sigui siegamente su tras. Esei no ta korekto! **Bo tin ku siña pensa pa bo mes anto hasi loke bo sa ta bon.**

2. Intenshonal...nan sa muchu bon kiko nan ta hasi. Talbes por ekskusá damanan i damitanan ku no sa kiko nan ta hasi. Ma no tin hustifikashon pa esnan ku ta bisti asina nètamente pa hala atenshon di hende hòmber.

Hopi hende muhé ta kulpabel...no damitanan so. Mi tabata sinta warda den outo un dia ora un mucha muhé di kisas 10 aña a baha di un outo bistí na un forma provokativo. Mi'n por a imaginámi dikon, te ora su mama a baha di outo...bistí meskos! Mamanan mes ta siña esaki dor di nan mal ehèmpel!

Frankamente bisá, ki diferensia tin entre e mentalidat ei i esun di prostituta? Tur dos ta bisti pa hala atenshon di hende hòmber dor di eksponé nan kurpa! Tur dos ta anunsiá bon kla, "Mi kurpa ta barata!"

Hesus tabata kategórik: "*ken ku wak un muhé pa dese'é, ya kaba el a kometé adulterio kuné den su kurason*" (Mateo 5:28). E hòmber sigur ta responsabel si e pensa immoral. E ta hasi piká. **Ma e muhé ku intenshonalmente ta bisti na un forma provo-kativo, stimulando pensamentu immoral den e hòmber, ta mes kulpabel.** Beibel ta instruí, "*..tene kuidou pa...no bira un piedra di trompeká pa esnan ku ta debil*" (1 Korintionan 8:9). Dilanti hues, esun ku kometé e krímen ta haña kastigu...i tambe esun ku a hinka palu bou di kandela, maske e mes no a partisipá!

E muhé ku ta bisti sèksi probokando "pensamentu sèksi" den e mente maskulino ta kulpabel di pusha palu bou di kandela i un dia e lo tin ku duna kuenta pa su piká dilanti e Hues hustu!